

Protocol da la radunanza generala da la Corporaziun Evangelica Zernez da marcurdi, ils 23 avrigl 2025, a las 19.30h, a Zernez

Preschaintas sun 23 persunas cun dret da vuschar.

S-chüsats sun: Steivan Gaudenz, Riet Felix, Reto Lehner e Letizia Brot.

Tractandas

1. Tscherna dals scrutinadurs
2. Protocol da la radunanza generala a Zernez dals 17 avrigl 2024
3. Rapport annual dal president
4. Rendaquint 2024 e rapport dals revisurs da quint
5. Dumonda extraordinaria dal consistori per man da la radunanza per surtrar per üna jada la limita da temp d'uffizi per la consistoriala Ottilia Godly.
6. Elecziun dad almain üna o ün nouv commember dal consistori. Per cas d'üna decisiun negativa pro tractanda 6 füss da tscherner eir ün/a successur/a per Ottilia Godly. Reelecziun dal president
7. Orientaziun sur dals sforzs per occupar nossa pravenda chi'd es fingià darcheu vacanta
8. Varia

Bivgnaint dal president

Hermann Thom dà il bivgnaint a las votantas ed als votants. Davo laschain intunar üna chanzuns dal coral, sco adüna accompogna nossa organista, Christa Pinggera, il chant dals radunats al clavazin.

La radunanza es perincletta da tour sü illa glista da tractandas amo la tscherna da trais commembers da la cumischiun sindicatoria. Hermann fa attent, cha la tractanda per far bun il preventiv ed il pè d'impostas nu manca. Id es uschè, cha la nouva ledscha chantunala prevezza d'utuon ün'ulteriura sezzüda cun quistas tractandas. Implü infuorma el, cha Maria Pardeller ha surtut la carica sco nouva chaschiera per la Corporaziun Evangelica.

1. Tscherna dals scrutinadurs

Il president propuona da tscherner sco scrutinaduras a Manuela Bonifazi ed ad Esther Christoffel. Ellas vegnan elettas da la radunanza sainza cuntravusch.

2. Protocol da la radunanza generala a Zernez dals 17 avrigl 2024

Il protocol nu vain prelet, cun quai ch'el es stat expost in differents lös ed as rechatta eir sülla pagina dad internet da la corporaziun evangelica. Il protocol vain fat bun sco expost sainza cuntravusch.

3. Rapport annual dal president 2024

Il president Hermann Thom prelegia seis rapport annual e la radunanza piglia cogniziun da quel sco segua:

Charas preschaintas, chars preschaints

L'on scuors es statt per mai sco president ün on na propcha agreabel, eu persunalmaing n'ha gnü dal principi da la stà davent difficultats culla sandà e tuot l'andamaint da la corporaziun evangelica nun es stat uschè chi vess forsa fat gnir tuot meglder.

Adonta cha nu vaivan a la fin üna ravarenda in nossa raspada, esa listess stat per mai ün on da fich blera lavur, per part eir amo cun disgusts, uschè ch'eu n'ha plüssas jadas ponderà scha quist presidi es amo supportabel per mai. Però eu nu fetsch quist rapport per am lamantar e less eir dir qua cha nossa cumünanza sco tala, la collavuraziun cul consistori, cun culuostras e culuosters, organistas e voluntaris e pustüt eir la lavur culs giuvenils sun stats facturs chi sun stats per mai agreabels ed allegraivels.

Adonta al fat cha ch'eu n'ha gnü grond plaschair d'avair chattà üna ravarenda, nun es la situaziun però statta propcha simpla. Insè vaivan da chefar cun üna persuna fingià pensiunada chi d'eira be substituta illa pravenda da nossa raspada e las ledschas da la baselgia chantunala nu laschaivan gnanca pro alch oter co ün contrat limità dal temp e dal pensum. Listess paraiva adüna darcheu qua üna tscherta imnatscha cha nus pudessan esser vaira svelt darcheu sainza ravarenda.

Causa cha davo ün lung temp sainza ravarenda nu lav eu bricha esser la cuolpa cha no rivessan darcheu in quella situaziun, haja dovrà da mia vart blera buna vöglia. Eu n'ha però pudü constatar buna vöglia eir dal consistori e collavuraturas e collavurats. A la fin haja listess principi december dat üna desditta da la ravarenda culla motivaziun da vulair surtour ün'otra sfida e da vulair esser ün agüd a sia famiglia. Que sun stats motivs acceptabels cha no tuots vain inscuntrà cun incletta. I nun ha però dūrà fin la fin da marz, dimpersè be fin pac avant Nadal, fin chi'd es stat dad organisar tuot la raspada sainza ravarenda. Ün lung temp eir amo cun üna gronda intschertezza scha quai es be temporar o dūra propcha fin la fin da la relaziun da lavur. Id es lura bod stat ün schligerimaint cur ch'eu n'ha savü in favrer cha oramai stögglia darcheu verer svesse co gnir a fin culla organisaziun da nossa raspada.

L'ultim chapitel da l'intera istorgia vegn amo hoz. Nus vain da preschantar ün quint cun ün fich nosch resultat. No vain gnü üna ravarenda cun ün'età plüchöntschi ota ed uschè eir cun üna paja plüchöntschi ota sco eir cuosts socials ots. Utra da quai, ha ella lavurà in ün pensum bler plü ot co previs il prüm ed eir las spaisas sun stattas extravagantas. Our da quel motiv d'eira insè da far quint cun ün resultat dal quint negativ, ma quel es lura stat fich negativ. Da dir es cha eir ils cuosts pel viadi da confirmands sun stats bler plü ots co fat quint, ma là pudaina sperar cha la baselgia chantunala surpiglia üna part da quels cuosts implü causa cha quels sun surtuot gnüts chaschunats tras üna malora.

Però uossa giain pro l'andamaint da l'on da nossa raspada.

Sco adüna vain nus al cumanzamaint da la stà gnü ün o l'oter battaisem, quist ons sun quai stats duos. In avuost vain sco adüna gnü nos program da stà cun ün unic cult divin per tuot la raspada mincha dumengia in ün'otra fracziun. Eir in avuost ha gnü lö nos viadi culs seniors cha no fain adüna in collavuraziun culla baselgia catolica e chi ha manà quist on a Poschiavo.

La predgia d'inscunter culla raspada dad Ardez-Ftan-Guarda sü Gonda, vain quist on gnü da spostar pervi da la plövgia illa baselgia da Lavin. Eir il giantar da cumpagnia vain gnü da far aint il süt in stüva da cussagl a Lavin, ma il grill vain listess pudü impizzar, quai oura sün lobgia da la chasa da scoula veglia da Lavin. Eir quel di ha cumanzà üna nouva lavur cun uffants pitschens, chi ha lura dūrant l'utuon gnü üna interrupziun, ma chi'd es previssa da cuntinuar in fuorma da predgīnas dūrant quist on. Al cumanzamaint da settember es stat a Samedan il di da las baselgias i'l rom da las festivitats da giubileum pels 500 ons uniun da las trais lias reticas chi han manà al chantun Grischun. Quai es stat il di da las baselgias organisà dal chantun Grischun. Culla baselgia chantunala e la regiun da baselgia Engiadina Bassa e Val Müstair ha nossa raspada organisà ün discuors al podi ed ün cabaret aint il auditori dal Parc Naziunal Svizzer ed eir ün'exposiziun sün Baselgia Gronda. Quai dūrant ils mais settember ed october. A Lavin ha

gnü lö eir in settember il cult divin ecumenic pella festa federalla. Quel müda minch'on fracziun alternant tanter las baselgias catolicas e refuormadas.

Ün chapitel da per sai es lura stat in october nos viadi da confirmands. Sco adüna organisain quel insembel culla baselgia catolica chi dà cun nus eir sia giuventüna da la listessa annada chi ha gnü la craisma avant cha'l temp da scoula va a fin. L'organisaziun dal viadi ch'eu n'ha fat insembel cun Monica Schöpf chi'd ha eir accompagnà a nus sün quel viadi es statta da prüm innan üna sfida. No vaivan 14 confirmandas e confirmands, ün'annada specialmaing gronda. La pro sun gnüts amo 5 giuvenils catolics. Per güdar e per promouvoir üna tscherta lavur da giuventüna vain nus minch'on eir giuvenils da nossa raspada chi han fat il cuors da giuvens manaders da la baselgia chantunala. Quist on vain gnü 4 da quels agüdants. Lura d'eiran amo quatter creschüts, chi per part (na no) vaivan eir amo tschertas pretaisas al standart da lur stanza. Ed a la fin vaivan la pretaisa da stuvair organisar ün viadi cun plüs lös da fermativa, nempe Genevra, Barcelona ed Avignon.

Il viadi es gratià il prüm tuot bain e cun restar pro'l budget pro ün import da suot milli per ün giuvenil nu d'eiran aint mal. Però l'ultima part da nos viadi es crodada in vair sen dal pled aint l'aua. In tuot la Frantscha d'eiran auazuns ed ingüns trens nu giaivan plü da Barcelona vers Frantscha e Svizra, uschè cha a Monica ed a mai nun esa restà oter co dad invlidar Avignon ed organisar in quatter gruppas per tuots ün svoul per tuornar in Svizra. L'ultim eschan rivats cun ün import da raduond 1400 francs per giuvenil bainquant sur il budget. La baselgia catolica ha pajà sia part e per nossa part vaina fat üna dumonda da sustegn a la baselgia chantunala chi ha impromiss da vulair surtour üna part dals cuosts implü chi'd ha dat.

Davo il viadi da confirmands es lura gnü il temp da las surpraisas. Eu sun gnü a savair fingià in october davo via chi darà üna desditta da nossa ravarenda, quella es lura amo statta in vacanzas e davo amo d'urant trais eivnas absainta ed intant es gnüda eir la desditta uffiziala. Lura davo quatter dis cha la ravarenda ha darcheu lavurà, es gnüda quella fin d'eivna ch'eu laiva ün pa am recrear in ün viadi cun ma mamma our in Austria. Invezza es que stat üna fin d'eivna plain agitaziuns e d'ün di sün tschel vain lura darcheu gnü d'ans randschar cun nossa raspada.

In quist lö lessa ingrazchar a tuot quels chi han dat sustegn in quella situaziun. Que sun stats ils ravarendas Jon Janett e Magnus Schleich e Peter Wydler, ils predichants laics Fadri Häfner, Seraina Guler, Alex Schaub ed Othmar Lässer. Ün special ingrazchamaint a Silvia Schlegel ed Annette Jungen chi han a l'improvista gnü da surtour la respunsabilità per uras da confirmands e Confirmaziun.

Id es però i inavant e quai brichafat uschè mal.

No vain gnü la prüma dumengia d'Advent ün bel cult divin cullas quatter preparandas chi sun uossa fingià las quatter confirmandas da l'on chi vegn. Cun ellas quatter eschan lura amo stats cun agüd da la consistoriala, Natalia Roner, a la fin d'eivna da scolaziun pro la Missiun 21 a Basilea.

L'ultima dumengia d'Advent vain lura gnü grazcha a Christa Pinggera ün bel inscunter d'Advent cun chant e lectüra.

Eir scha organisà a cuorta vista vain pudü far tuot ils cults divins da Nadal e Silvester ed eir il tradiziunal cult divin da Chalandamarz a Lavin es stat fich bel ed agreabel.

Per finir vaina gnü amo ün di da schoppa da record cun cult divin ecumenic e cun raduond 130 persunas chi sun statts in chasa da scoula a mangiar la schoppa grazcha fich ad Anna Zala ed ad Ottilia Godly ed eir a tuot nossa giuventüna per lur grond ingaschi.

Ed a la fin dal tuot vain gnü üna confirmaziun chi'd es gnüda lodada da tuot las varts cun ün bel ingaschamaint da nossa giuventüna, ma eir ün bun möd da la respunsabla Silvia Schlegel e da ravarenda Annette Jungen chi han sustgnü a la giuventüna sün quista via.

Sco chi'd es tradiziun in nossa raspada vain in dumengia passada gnü il seguond da quels duos dis da l'on cha no vain gnü quatter predgias, in mincha fracziun da nossa raspada üna. Que es alch cha dal rest nun es alch chi'd es be cler! In otras raspadas cun plüssas fracziuns nu daja que fingià da lösch innan na plü.

Per finir lessa uossa amo ingrazchar a mias collegas dal consistori, a collavuraturas e collavuratur, a voluntaris e voluntarias ed insomma a tuots per la buna cumünanza. Grazcha fichun!

Grazcha per l'attenziun – in buna fai, vos president

Tuot la radunanza ha splattà ed as ingrazcha cun quai pro Hermann.

4. Rendaquint 2024 e rapport dals revisurs da quint

Il president dà il pled a la chaschiera, Flurina Walter. Ella preschainta il quint da gestiun ed il bilantsch per l'on 2024 e declera divers detagls. Il quint da gestiun da la raspada serra cun üna perdita da CHF134'521. Quista perdita as cumpuona per gronda part da sortidas extraordinarias illa chüra d'ormas e cult divin. Ün augmaint dal pensum ed il salari ot causa l'età da la ravarenda han chaschunà üna gronda part dal deficit. Eir il viadi da confirmands a Barcelona cun üna gronda annada e l'interrupziun da quist han cuostü daplü sco previs. Pervi da grondas maloras in Frantscha han ils scholars stuvü gnir svolats inavo in Svizra, la colliaziun previssa vers chasa cul tren nu d'eira quel mumaint plü pussibla. Implü vegnan ils cuosts e las amortisaziuns da la chasa pravenda a Zernez.

La revisura Esther Christoffel prelegia il rapport dals revisurs da quint. I'l rapport es scrit cha tuot es in bun uorden e manà tenor las pretaisas. Ils revisurs da quint propuonan dad approvar il quint ed eir da dar dis-charg als organs respunsabels. La radunanza segua a quella proposta sainza cuntravusch.

5. Dumonda extraordinaria dal consistori per man da la radunanza per surtrar per üna jada la limita da temp d'uffizi per la consistoriala Ottilia Godly

Per quista tractanda banduna Ottilia Godly la radunanza. Sco cha Hermann disch füss Ottilia pronta da's laschar reeleger excepziunalmang per ün'ulteriura perioda d'almain ün on implü i'l consistori. Per dar cuntinuità a nossa raspada füss quai da gronda valor. D'utuon ha Ottilia surtut a cuorta vista il vice-presidi ed ha rapreschantà la raspada in mumaints cha nos president bsögnaiva agüd. La lunga experienza dad Ottilia ha servi güsta d'ürant l'on passà difficil plüssas voutas al consistori. La radunanza generala reelegia unanimamang ad Ottilia Godly per ün'ulteriura perioda da maximalmang trais ons.

6. Elecziun dad almain üna o ün nouv commember dal consistori e reelecziun dal president sco eir trais revisurs da quint

Natalia Roner sto sortir dal consistori pervia ch'ella nun ha plü sias scrittüras a Zernez. Il consistori propuona la tscherna dad Andrea Scandella da Zernez. Davo la proposta da desister sün üna votumaziun per scrutin vain tschernüda Andrea Scandella unanimamang i'l consistori. Hermann Thom po gnir reelet per üna perioda d'uffizi da maximalmang trais ons sco president dal consistori. Ottilia Godly surpiglia il pled per la tscherna. Eir per quista tscherna nu vain giävuschà il scrutin e Hermann vain reelet unanim sco president. Già l'on passà han ils revisurs da quint avisà lur demischiun per quist on. L'unica candidat es Reto Lehner. El vain elet da la radunanza

unanimamaing. Ils duos posts vacants dessan gnir occupats d'utuon in occasiun da la radunanza da preventiv.

7. Orientaziun sur dals sforzs per occupar nossa pravenda chi'd es fingià darcheu vacanta

Hermann Thom infuorma a la radunanza cha la piazza da ravarenda saja gnüda scritta our in divers lös. I sun entradas duos annunzchas, üna da quellas füss gnüda sustgnüda da la baselgia chantunala. Il giuven ravarenda da la Germania es gnü a Zernez as preschantar e paraiva fich interessà. Per motivs privats ha el però retrat si'annunzcha. Davo es gnüda scritta our eir la piazza d'ün substitut dal ravarenda. Pel mumaint s'interessa ün giuven ravarenda per surtour quista piazza almain per ca. ün on e mez fin cha Luzia Bühlmann ha serrà giò tuot seis stüdis e pudess eventualmaing surtour la piazza. Andri Steiner propuona dad eleger üna cumischiun per l'elecziun dal nouv ravarenda. Jack Pinggera ingrazcha a Hermann per la gronda lavur d'occupar tuot ils cults divin cun ravarendas ed agüdants.

8. Varia

Il president, Hermann Thom da liber il pled suot vaira.

Als 23 mai 2024 ha lö a Susch la not lunga da las baselgias. Hermann preschainta il flyer chi vain tramiss amo quist'eivna in tuottas chasadas.

Ottilia Godly ingrazcha a tuots chi han tut part a quista sezzüda, als collegas dal consistori, als culuosters ed organists, als ravarendas e lur agüdants e specialmaing a Hermann Thom per seis ingaschamaint. Hermann piglia cumgià ed ingrazcha a Natalia Roner ed als revisurs da quint per lur gronda lavur.

Davo ün'ulteriura chanzun vain la sezzüda serrada a las 20.50 h, davo han tuot ils preschaints per finir pudü star amo da cumpagnia pro ün aperitiv.

In buna fè

L'actuara Monica Schöpf